

UKA2017-87

16. Nov. 2017

Michael Rosing

Attaviitsoq

Uunga siunnersuut: Aalisarneq pillugu Inatsisartut inatsisaat nr. xx, xx. xxx 2017-imeersoq.

(Aalisarnermut Piniarnermullu Naalakkersuisoq)

Ullut marlussuit matuma siorna aperineqarpunga maannakkut suliarisarput aalisarnermut inatsit nutaaq pitsaasortaqaarnersoq. Angerpara. Aalisartitseqatigiiffiit misileraalluni aalisarnermut peqataasut aalisakkanut nassaaminnut ukiuni pingasuni immikkut aalisarsinnaanissaannut tunngavissiaq isumassarsiatsialattut isigaara. Piumassuseqalersitsissaaq aalisarnernik nutaanik nassaarniarnissamut pineqaraluarpataluunniit aalisakkat nutaat imaluunniit aalisarfiit nutaat. Uangalu nammineq tamanna arlaleriarlunga qaqittarnikuugakkut siunnersuutip ilaanut tassunga taamaallaat isumaqataaginnarsinnaavunga.

Siunnersuutip sinnera annertigut isumaqatiginngilara. Aalisarneq inuutissarsiutaavoq allatulli aamma inuutissarsiutini allanisulli aalaakkaasumik isertitaqartoqartassappat pisariaqartinneqarpoq aalaakkaasunik sinaakkuteqarnissaaq. Aalisarnermut iluani sinaakkutissat aalaakkaasutut oqaatigineqarsinnaanngillat. Ukiorpassuarni aalisakkat assigiinngitsut aalisapilussimavagut aalisarneq aserorlugu. Aalisarnerni arlalinni aalisartut amerliartupiloorsinnaatitaanikuupput. Maannakkulli siunnersuutigineqarpoq pisassiissutit amerlasuut aalisarnermini tunngavigisaat arsaarinnissutigineqassasut.

Inatsisissatut siunnersuut imaqarpoq immikkoortunik assigiinngitsunik arlalinnik tassani angallatit pisassiissutininik arsaarneqarsinnaassallutik imaluunniit aalisartitseqatigiiffiit pinngitsaalineqassapput pisassiissutininik pigisaminnik nioqquteqaqqullugit. Imaassinnaavoq pisassiissutininik pigisanik nutaamik naatsorsueriaaseqalerneq naapertuunnerusumik tunngaveqartoq, kisianni allangortinneqarsinnaanngilaq aalisartitseqatigiiffiit kalluarneqartussat pisassiissutininik pisinikummata aamma pisassiissutinit pigisanik aalisartitseqatigiiffinniit allanit neriuutigalugu tigungmiinnarsinnaassallugit.

50 procentikkaaraluni aqqissuussineq assersuutaavoq taamaaqqissaartoq. Ullumikkut agguaariaaseq atuuttoq aalisarnermut attuumassuteqartut isumaqatigiinniarnernanni angusaavoq. Taama tunngavissaalitsitigaluni pisassiissutininik agguaasseqqinniarneq akuersarneqarsinnaanngilaq.

Pisassiissutit pingajussaannik aallangortinneqarnissaat siunnersuutaavoq Inatsisartut inatsisiliorsinnaasut raajarniarnissamut akuersissutininik utertitsinissaaq pillugu ukiunik tallimanik sioqqutsilluni nalunaaruteqarnikkut. Aamma taamatut periuseqarniarneq akuersarneqarsinnaanngilaq. Aalisarnermi apeqqutaajunnaarnikuuvoq umiatsiarsisoqassanersoq aamma ningittakkanik pisisoqassanersoq. Nutaaliaasumik unammilleqatigiinneq tunngavigalugu aalisarnermi pisariaqarpoq angisuunik piffissarlu ungasinnerusoq isigalugu aningaasaliinissaaq tunisassiornermut atortunut aamma pilersisaarnissamut. Kilisaatip nalikillilernissaa ukiunik 20-nik sivirususeqarpat ukiorpassuarnilu nioqquteqarfissanik

inerisaasimalluni, taava pisassiissutinik ukiunik tallimanik sioqqutsilluni nalunaarnikkut atorunnaarsinneqarsinnaasunik peqarneq aningaaserivimmut qularnaveeqqutitut atorneqarsinnaangilaq.

Aalisarnej nallerneqarsinnaangitsumik inuussutissarsiutitta annersaraat. Aalisarnermi tunngaviusumik atukkat pillugit allannguutissatut siunnersuutigineqartut toqqissisimajunnaarsitsivoq aamma aalisarnerup avataani. Apeqqutaalerpoq Kalaallit Nunaat tatigineqarsinnaanersoq imaluunniit naamik. Allannguutissatut siunnersuutigineqartut nunamut toqqaannartumik isertitatigut annaasaqaataanissaasa saniatigut aamma milliartilikkaanik taarsiiffigitinnissaq anguniarlugu eqqartuussivimmut suliassanngortitsisoqarsinnaavoq. Kikkulluunniit Kalaallit Nunaannut aningaasaleerusuttut Kalaallit Nunaannilluunniit niueqateqarusuttut qularilissavaat tunngaviusumik sinaakutissat ilumut siunissami aamma taamaaginnassanersut.

Taamaattumik matumap inatsisissatut siunnersuutip itigartinneqarnissaa taamaallaat inassutigisinnaavara.